

中國易學文獻集成續編

本書編委會◎編

35

全七十冊

國家圖書館出版社

中國易學文獻集成續編

本書編委會◎編



國家圖書館出版社

（清）納蘭性德撰

合訂刪補大易集義粹言八十卷

（卷十四——二十七）

清同治間刻《通志堂經解》本

第三十五冊目錄

合訂刪補大易集義粹言八十卷（卷十四—二十七）（清）納蘭性德撰 清同治間刻

《通志堂經解》本

卷十四		一
卷十五		四一
卷十六		八九
卷十七		一二五
卷十八		一六三
卷十九		一九九
卷二十		二四一

卷二十一		二八一
卷二十二		三二五
卷二十三		三七五
卷二十四		四〇七
卷二十五		四四九
卷二十六		四九一
卷二十七		五四五

合訂刪補大易集義粹言卷第十四

後學成德

三三

乾上

伊川先生曰履序卦物畜然後有禮故受之以履夫物之聚則有大小之別高下之等美惡之分是物畜然後有禮履所以繼畜也履禮也禮人之所履也爲卦天上澤下天而在上澤而處下上下之分尊卑之義理之當也禮之本也常履之道也故爲履履踐也藉也履物爲踐履於物爲藉以柔藉剛故爲履也不曰剛履柔而曰柔履剛者剛乘柔常理不足道故易中惟言柔乘剛不言剛乘柔也言履藉於剛乃見卑順說應之義

易傳

東萊呂氏曰物畜然後有禮言物惟畜之多故好譬如水積畜多故波瀾自然成文又如燈燭若一燈一燭固

未見好惟多後彼此交光然後可觀易說

履虎尾不咥人亨

伊川先生曰履人所履之道也天在上而澤處下以柔履藉於剛上下各得其義事之至順理之至當也人之履行如此雖履至危之地亦无所害故履虎尾而不見咥嚙所以能亨也易傳

白雲郭氏曰履者行道之義乾在上天道也天道至大天下之所難履而行之也故有履虎尾之象履虎尾直取其難非取其爲害也然履虎尾者有咥人之患履乾之道者雖難而无咥人之患惟有亨之理也孔子言博施濟衆則曰堯舜其猶病諸言修己以安百姓則曰堯舜其猶病諸信乎天道之難履如此易說

新安朱氏曰兌亦三畫卦之名一陰見於二陽之上故

其德爲說其象爲澤履有所躡而進之義也以兌遇乾和說以躡剛強之後有履虎尾而不見傷之象故其卦爲履而占如是也人能如是則處危而不傷矣本義
彖曰履柔履剛也說而應乎乾是以履虎尾不咥人亨剛中正履帝位而不疚光明也

伊川先生曰兌以陰柔履藉乾之陽剛柔履剛也兌以說順應乎乾剛而履藉之下順乎上陰承乎陽天下之正一作至理也所履如此至順至當雖履虎尾亦不見傷害以此履行其事可知○九五以陽剛中正尊履帝位苟无疚病得履道之至善光明者也疚謂疵病夫履是也光明德盛而輝光也並易傳

橫渠先生曰說雖應乾而二不累五也○无陰柔之累故不疚此所以正一卦之德也並易說

藍田呂氏曰履踐而行也允有所進居乾之後六三以一陰進逼於乾柔履剛者也履道莫艱於此此履所以名也乾虎也六三進逼於乾履虎尾者也以說應者物莫之傷故不咥人亨也

廣平游氏曰卦之才則以一柔進退履衆剛故有履虎尾之象然而不咥人亨者說而應乎乾故也蓋說而已不應乎乾則不敬應乎乾而已非說則不和夫敬以和何事不行君子之所履苟在於是則雖暴人之前无虞矣雖蠻貊之邦行矣況於華夏乎故履虎尾不咥人而又亨也君子之所履未嘗不在於禮而禮勝則離今至於履虎尾而亨則其它可知矣此履之善也此合一卦之才言之若就一爻之義則六三蹈虎尾而凶矣故爻彖異辭猶之彖言剛中正履帝位而不疚而九五言夬

履貞厲也○剛中正履帝位而不疚者兌澤下流故也
膏澤下於民則貴爲天子富有四海而內省不疚矣此
天下所以心悅而誠服也天下心悅而誠服則親之若
父母仰之若日月敬之如神明畏之如雷霆可不謂光
明矣夫若其據利勢之重阻法度之威以臨莅天下而
澤不加於民則民咨胥怨疾首蹙頞而相告矣夫如是
則從之者勢也而心背之事之者貌也而腹非之夫何
光明之有

並易說

龜山楊氏曰上天下澤尊卑之分定矣卦之所以爲履
也履禮也六三處兌而承乾說而應乎乾者也禮以用
和爲貴說而應和之至也用和以往雖履至危之地无
所害矣故曰履虎尾不咥人亨夫乾剛中正德威而光
明矣故履帝位而不疚病也不疚言安於其位也然獨

稱帝位者蓋禮者天地之別也以天地之別言之則上下之分勢相絕矣故稱帝焉以言其與天同體也易說兼山郭氏曰乾天道也天之道剛健中正唯中正可以應之中則不欺正則不邪持此以履虎尾可也故禮之質忠信而已矣易說

白雲郭氏曰履之所以難者以六三之柔而履天之剛德是以難也說而應乎乾則與乾合德是以能履而有不咥人亨之象剛中正九五也履帝位而不疚然後其道下濟而光明疚則不能光明也剛德常過過則疚剛而不過斯不疚矣故允恭克遜堯所以光被溫恭允塞舜所以文明皆剛而中正者也謂之不疚者如此易說漢上朱氏曰履踐也言踐履之道一柔而履二剛上爲乾剛所履不言剛履柔者三柔履之主也以柔履剛踐

履之難處之得其道履之至善也故曰柔履剛此以六三一爻言履之義也卦後爲尾兌爲虎爲口虎口啞人者也乾健也上九極乾六三以柔履其後上九與三相易上復成兌是履猛虎之尾怒而見啞者也三兌體下說乎人之情上應乎乾上極健而我應之以和雖剛而不忤和而不流柔而不犯推是道以行蹈呂梁之險可也故處乎五剛之閒柔而能亨關子明曰履而不處其周公平故曰說而應乎剛是以履虎尾不啞人亨此合兩體言履至危而亨也九五以天德臨下剛不中正有所偏係則君子畏禍將去之小人以柔邪而進陽爲陰所病矣九五中正踐帝位立乎萬物之上无所累其心舜禹之有天下也履道至此光明格於上下矣離爲明疚病也陰陽失位爲病六三不正五不應之不疚也故

夫子贊之曰剛中正履帝位而不疚光明也今之王古
之帝也獨於履言帝位者易君德而當君位者五卦否
无妄同人遯乾體也而无履之時有是德有是時而履
是位者唯履而已上下履位物物循理之時也在卦氣
爲六月太玄準之以禮易傳

五峯胡氏曰袁渙之荅呂布嚴顏之荅張飛薛包之事
父母謝安之待桓溫所處至順所言至當皆以柔履剛
說而應之故雖履強猛暴戾之地終不見傷害也紂至
強暴也而文王微柔懿恭以事之故能免於羑里以西
伯一怒而安天下之民剛得中正履帝位而不疚其德
光大明於天下後世也其亨可知易外傳

新安朱氏曰柔履剛以二體釋卦名義說而應以卦德
釋彖辭剛中正又以卦體明之指九五也本義○履虎尾

言履危而不見傷之象便是後履前之意隨著它後去
○履卦上乾下兌以陰躡陽是隨後躡他如踏他脚迹
相似所以云履虎尾是隨後去履他尾也故於卦之三
四爻發履虎尾之義便是陰去躡他陽背脊後處伊川
却說作履藉說得生受了

並語錄

東萊呂氏曰履德之基也履之爲卦上乾下兌所謂以
柔履剛兌柔也乾剛也兌以柔見履於剛是卑順自處
得其分所以履之爲義學者踐履其用最切孔子彖辭
履虎尾不咥人亨天下之至危者莫如履虎尾今則履
虎尾而无吞噬之患自此以往何所不可所謂履者凡
履踐之道皆在焉聖人繫之以辭獨舉最危者言之何
也大抵學者踐履工夫須於至難至危之處自試驗過
得此處方始无往不利若舍至難至危其它踐履不足

道也先難之義也說而應乎乾惟易簡始知險阻若欲履虎尾之至危以剛很不可以機械亦不可惟以柔順和悅則雖處至危之地亦无所不安矣彖又推究其本意曰剛中正履帝位而不疚光明也孔子蓋以君位言之凡孔子之彖易多是發其大者以示人天下之至危者无過於履虎尾天下之至尊者无過於履帝位舉二大端以示人凡履踐之事莫不在其中矣九五以剛而居中得正然而申之以不疚之辭何也蓋履天位至難雖以中正之德若非慄慄危懼用剛之過則夫履貞厲惟是履帝位而不疚然後光明學者當深玩夫子之彖辭自履帝位推之自尊及卑自履虎尾推之自危及安引而伸之觸類而長之天下之時位莫不皆在其中矣

象曰上天下澤履君子以辯上下定民志

伊川先生曰天在上澤居下上

一作天

下之正理也人之所

履當如是故取其象而爲履君子觀履之象以辨別上下之分以定其民志夫上下之分明而後民志有定民志定然後可以言治民志不定天下不可得而治也古之時公卿大夫而下位各稱其德終身居之得其分也位未稱德則君舉而進之士修其學學至而君求之皆非有預於己也農工商賈勤其事而所享有限故皆有定志而天下之心可一後世自庶士至於公卿日志於尊榮農工商賈日志於富侈億兆之心交驚於利天下紛然如之何其可一也欲其不亂難矣此由上下无定志也君子觀履之象而分辨上下使各當其分以定民之心志也

易傳

廣平游氏曰天高地下禮制行矣人之所履禮而已故

上天下澤有履之象君子觀象於此則可以辨上下下既辨則名分立而民志定矣此以成卦之體言之也○禮者所以辨上下而定民志也蓋上下之分嚴則豐者不爲有餘殺者不爲不足而民志定此先王因人性以制之而理之不可易也其或强有力者竊其非分而有之欲自以爲榮是播其惡適足以發笑而自黜爾所
有者非其分既不足以爲榮而身陷不義更足以爲辱愚孰甚焉此臧文仲居蔡所以爲不智也季氏以八佾舞三家以雍徹正類於此而臧文仲當時名大夫必嘗以智稱故仲尼以爲何如其智以明其大者不知其它不足稱也如以爲先王之爲禮將以籠天下之愚而拘之則荀卿化性起偽之說行矣譬如今人未仕而服青紫人必以爲病狂文仲之愚不幸類此

並易說